



SEORANG penduduk, Rahim Mokhtar membersihkan lumpur yang memasuki kawasan rumahnya.



SEKUMPULAN kanak-kanak melintasi air banjir berlumpur yang memasuki kawasan rumah di Kampung Melayu Batu 16, Rawang, Selangor semalam. - UTUSAN/AZMAN ASMAYATIM

Penduduk Jalan Sepakat dakwa projek jalan jadi punca

Derita dilanda banjir lumpur

Oleh MUHAMAD AIMY AHMAD
kota@utusan.com.my

RAWANG 4 Dis. - Lebih 10 buah keluarga di Jalan Sepakat, Kampung Melayu Tambahan dekat Batu 16, di sini terpaksa menanggung derita apabila hujan lebat pada petang semalam mengakibatkan kediaman mereka dinaiki air.

Lebih parah apabila banjir yang berlaku sejak pukul 5.30 petang semalam membawa bersama lumpur, batu dan pasir dari tapak projek berdekatan yang penduduk dakwa sebagai punca bencana itu berlaku.

Penduduk mendakwa, projek pembinaan jalan pintas dari Rawang ke Serendah yang bermula sejak tiga bulan lalu telah menyebabkan sungai berdekatan rumah mereka menjadi semakin cetek sehingga air melimpah apabila hujan lebat.

Seorang penduduk, **Mohamad Noor Rajae**, 54, berkata, sekiranya pihak pemaaju membina penampungan berdekatan kediaman mereka, kejadian itu berkemungkinan tidak akan berlaku.

"Kami kesal dengan kejadian ini. Penduduk sekitar tidak menolak pembangunan tetapi sepatutnya pemaaju dan pihak berkuasa tempatan mempunyai perancangan



SUBAHAN Kamal (empat dari kiri) bertanya masalah yang dialami penduduk yang berhadapan masalah banjir berlumpur sewaktu melawat mereka semalam.

yang rapi sebelum melaksanakan-nya," katanya di sini hari ini.

Tinjauan *Utusan Malaysia* hari ini mendapati, penduduk sedang sibuk mencuci rumah masing-masing dan aliran air sungai yang laju dilihat melimpah sehingga ke tengah hari ini.

Malah, empat buah jentolak di-

gunakan untuk mengorek kembali mendapan sungai yang dipenuhi pasir itu, sebelum alirannya kembali lancar seperti sedia kala.

Seorang lagi penduduk, **Saufiz Abdul Aziz**, 31, berkata, biarpun air yang memasuki rumahnya hanya paras buku lali, namun lumpur yang dibawa bersama memeritkan

kerja-kerja mencuci.

"Ketika kejadian saya baru pulang dari bekerja dan mengawasi air di bahagian belakang rumah. Kemudian saya terdengar jeritan jiran yang memberitahu air masuk ke rumah kami melalui pintu depan secara tiba-tiba," katanya.

Ahmad Hadzer Daud, 50, pula



SEKUMPULAN kanak-kanak bermain air banjir berlumpur yang masih melanda kampung mereka akibat hujan lebat petang semalam.

berkata, kejadian itu bukan kali pertama berlaku kerana bencana sama pernah mereka alami ketika sebuah projek lain dijalankan berdekatan kampung itu dahulu.

"Cuma kejadian banjir lumpur kali ini yang paling teruk, tambahan pula musim hujan yang melanda ketika ini," katanya.